

兩
浙
名
賢
錄

兩浙名賢錄卷四十六目次

文苑

宋

翰林學士錢希白易

兄昆附

侍中錢希聖惟演

公安謝化南炎

邵正字煥

集賢院學士楊子正

鮑弱翁剛

葉郎中參

子清臣附

職方員外郎齊祖之唐

姚寶臣鉉

施昌言附

殿中丞方公輔仲謀

屯田郎謝師厚景初

進士吳可幾

弟知幾附

郡丞楊公濟靖

都官郎張先

徐教授無黨

知南雍周蕙彥錫

晉陵令陸元先蒙老

吳縣令沈庸達遠

毛筠川維瞻

劉燾

安撫使陳思子汝錫

秘書正字周汝成邦彥

司勳郎鮑欽止慎由

毛秀州澤民涉

魯虔州伯能

林國材幹

洪州錄參萬先之庚

新喻尉喻季直良弼

喻良弼行
修德炳用

潘雄飛翼

中書舍人范元卿端臣

集英殿修撰何德輔

樞密院編修官姚令威

滕元秀

林進士伯仁

南陵尉蔣朝式

進士王子潤

江東提刑王順伯

太府卿王清叔

衡陽簿薛持志

朝奉大夫華安仁

鎮子初

知臨安鞏仲至

隆興教授陳彥羣

守興化軍樓叔暘

弟

開門舍人潘德久

文虎

趙紫芝師秀

翁卷徐璣

徐道輝

著作郎劉安道

周會卿

學古子宗夷

國子助教陳繹曾

秘書少監俞兼善享宗

北門學士盧申之祖臯

翰林學士應之道餘

國子司業陳壽老者卿

萬竹先生高瑞叔元之

趙叔午汝迂

神童柴蒙亨

趙幾道汝回

時天彝少章

嚴州司戶趙澤民崇滋

閩風先生舒舜侯嶽祥

忠州判官趙季清善得

解元姚正子夢午

戴復古式之

父東阜
子附

黃彥實叔英

處州教授邵德芳桂子

編修林能一千之

尹耕道起莘

薛叔容據

翰林承旨趙子固孟堅

孫因晉

知江寧莫光朝

元

學錄鄭德仲芳叔

子覺民附

于介翁石

淵穎先生吳立夫萊

教授戴帥初表元

任士林附

黃宏

侍講學士袁伯長楠

翰林待制柳道傳貫

趙子昂孟頫

夫人管氏子雍附

翰林學士陳子經桎

祖著父泌附

儒學提舉白延玉珽

金叔肖似孫

陳景傳堯道

父希聲弟
舜道附

吳見心復

徐秉國鈞

寧國司理楊仲弘載

傅景文野

仇仁近遠

應彥文文虎

翰林承旨張仲舉翁

甌寧縣丞盛明與

秘書監丞李季和孝光

葉景修森

姚時和應鳳

奎章閣博士柯敬仲九思

馮士順

高則誠明

桐廬李文

莫景行維賢

赤城令楊庶夫維楨

附自傳

戴叔能良

孫以貞固

諮議參軍王元章冕

梁建中

林愚齋靜

沈元吉貞

兩浙名賢錄卷四十六目次終

兩浙名賢錄卷之四十六

東海徐象梅仲和氏誤

吳興茅維孝若氏閱

文苑

宋

共八十四人

翰林學士錢希白易

兄昆附

錢易字希白先世臨安人自其父吳越王侑爲大將朝進思所廢始居會稽而立其弟叔歸朝羣從悉補官易與兄昆獨不見錄遂刻志讀書年十七舉進士御試三

題日中而就有司以其輕儇黷之然自此以文華知名
太宗嘗語樵易簡曰朕恨不與李白同時易簡曰今進
士錢易爲歌詩殆不下白欲用唐故事召至禁林不果
咸平二年再舉進士甲科爲光祿寺丞景德中舉賢良
方正科策入等擢至翰林學士卒易才思敏贍數千百
言立就真宗封泰山獻殊祥錄汜汾陰命修車駕所過
國經獻宋雅一篇易歌詩有義山長吉體而俊逸過之
又善行草有集一百六十卷青雲總錄一百卷洞微志
十卷兄昆亦能詩善草隸舉淳化中進士歷十州治尚

寬簡累官右諫議大夫以秘書監老於家

侍中錢希聖惟演

錢惟演字希聖俶之子幼有俊才從俶歸朝爲右屯衛將軍博學能文辭召試學士院以笏起草立就真宗稱善改太僕少卿獻咸平聖政錄命直秘閣預修冊府元龜大中祥符八年擢知制誥翰林學士累遷兵部樞密使除大名軍節度使知河南加同平章事判許州上耕籍入侍祠爲景靈宮使判河南改鎮崇信卒贈侍中謚文僖惟演出於勲貴文章清麗名與楊億劉筠相上下

於書無不讀。嘗曰：學士備顧問，不可不該博。故其家聚書，半於秘府。所著有與懿集、樞庭擢髦前後集、伊川漢上集、金坡遺事錄、飛白書叙錄、蓬辰錄、奉藩書事諸書，行於世。

公安謝化南炎

謝炎，字化南，嘉興人。爲文慕韓柳，與盧積齊名。積與盧炎，勁急性相反，而相厚善。時稱盧謝端拱初舉進士，補昭應主簿，徙伊闕，連知華容、公安二縣，治績粲然。有集二十卷。

邵正字煥

邵煥，淳安人。登進士第，官至金部員外郎。煥英年挺秀，精藻，過人。七歲時，隨父兄應舉。時郡方建鼓樓，題詩於壁，援筆而就。郡守杜惟一奇之，奏令赴闕。真宗以其年幼，賜帛遣歸。咸平三年，十歲，復以童子召赴闕，令賦春雨詩，頃刻而成，文不加點。是年登進士第，除正字，令於秘閣讀書。上嘗引之入宮，命賦睡宮娥詩。煥應聲云：玉腕枕香腮，荷花藕上開。乃命就職。

集賢院學士楊子正大雅

楊大雅字子正錢塘人十歲作雪賦稍長日誦書數萬言端拱二年乙科登第咸平三年交趾獻犀大雅獻犀賦召試學士明年上書獻所爲文二十餘萬言乃直集賢院歷二十五年不遷或笑其違世自守大雅歎曰吾不學乎世學乎聖人吾之所有不敢以薦於人而嘗自獻於天子矣天信中賜淮南循江按部過金陵江上遇風冠服盡失丁謂遣人遺衣一襲大雅不受謂以爲歡宰相王欽若亦不悅晚與陳從易並知制誥出知亳州卒所著有大隱集職林兩漢博聞若干卷大雅幼孤且

立刻苦爲文躬儉約不妄進取人知其爲有德君子子
有澹泳漸沆風大人

鮑窮翁剛

鮑剛字弱翁括蒼人少負大節善屬文尤長於詩始舉
進士不第卽毅然曰此非吾所學也遂徜徉於東南山
水間俗事略不關意時將士陶弼以詩名少許可得剛
所作以爲出已上願得爲友剛亦雅聞弼因徒步歸之
初剛與呂惠卿善熙寧中惠卿參知政事欲用剛剛曰
吾老矣卽日出京師竟卒於秦州旅邸

葉郎中參

子清臣附

葉參烏程人。博學多文。工於筆札。宋初州人業儒者寡。參卓然自立。苦志讀書。不爲流俗所移。咸平中登進士第。累官兵部郎中。出守鄉郡。子清臣天聖初舉進士。踐西掖北門之選。詞章炳蔚。馳譽一時。

職方員外郎齊祖之唐

齊唐字祖之。山陰人。唐觀察使齡之後也。少貧苦。學得書。輒手錄之。過誦不忘。郡從事魏庭堅聞士也。謂唐曰。今士多不讀書。唐曰。幸公任意。以几上書。令唐一誦之。

庭堅以一帙開示乃文選頭陀寺記而唐誦不遺一字
庭堅大驚服登天聖八年進士嘗進龍韜豹略賦兩應
制科對策皆第一嘗路忌其切直復排去之後爲南雄
州金判會交趾進麒麟唐據史傳非之斥蠻人給中國
衆服其博物以職方員外郎致仕卒初鑑湖東北有山
巋然與禹陵相望最爲山水奇絕處唐命其山曰少微
而卜築焉所著有學苑精英少微集各三十卷

姚質臣鉉

施昌言附

姚鉉字寶臣吳興人博綜羣籍能文辭嘗取有唐一代

之文搜其尤者得百卷題曰文粹當時服其精確以光
昭明文選鉉自爲序其略曰有唐三百年用文治天下
陳子昂起於庸蜀始振風雅跡是沈宋嗣興李杜傑出
六義四始一變至道洎張燕公以輔相之才專誤述之
任雄辯逸氣聳動羣聽繼許公繼以宏麗丕變習俗而
後蕭李以二雅之聲本述作常楊以三疊之體演絲綸
郁郁之文於是乎在惟韓吏部超卓羣流獨高遠古以
二帝三王爲根本以六經四教爲宗師憑陵輻輳首唱
百文遇橫流於晉楚闢正道於坦夷於是柳子厚李元

賓李翱皇甫湜又從而和之則我先聖孔子之道炯然
懸諸日月故論者以退之之文可繼楊孟斯得之矣至
於賈常侍至李補闕翰元谷州結獨孤常州及呂衡州
溫梁補闕肅樞文公德輿劉賓客禹錫白尚書居易元
江夏稹皆文之雄傑者與世謂貞元元和之間辭人咳
唾成珠玉豈虛也哉鉉徧閱羣籍耽玩研究掇菁擷華
十年於茲得古賦樂章歌詩贊頌碑銘文論箴議表奏
傳錄書序凡爲一百卷命之曰文粹止以古雅爲命不
以雕琢爲工披而覽之李唐一代之文在是矣時同邑

施昌言爲撰後序仕殿中侍御史亦一時文士也

殿中丞方公輔仲謀

方仲謀字公輔青谿人登進士第累官殿中丞仲謀稟性貞介而文藻蔚然其爲詩不事雕鏤聲律渾厚有神。綜獨運之能無纖穠華媚之態一時稱爲作者有雉山集二十卷行於世

屯田郎謝師厚景初

謝景初字師厚絳之子也慶曆六年甲科及第以大理評事知越州餘姚縣始作海塘防水患民賴以安累遷

益州路提點刑獄以屯田郎致仕景初性倜儻勁情博學能文尤長於詩子婿黃庭堅以詩名家庭堅自謂本從諸公得句法

進士吳可幾

弟知幾附

吳可幾吳興安吉州人舉景祐二年唐卿榜進士好古博雅與弟知幾相繼登第以文章雄視一世時以方吳之二陸可幾所著有千姓編知幾性尤篤孝父歿廬墓三年平地泉涌人稱曰孝子泉

郡丞楊公濟壻

楊蟠字公濟臨安人登慶曆六年進士第嘗作錢塘百
詠詩歐陽修讀其集有詩云蘓梅又作黃泉客我亦今
爲白髮翁即讀楊蟠一千首乞渠秋月與春風王安石
有答蟠書曰讀足下之文但知畏之願造所聞蘓軾守
杭蟠丞郡與軾倡酬平生爲詩數千篇後知壽州提點
刑廣鑄錢卒

都官郎張先

張先烏程人登康定進士第歷都官郎中詩格清麗尤
工於樂府有雲破月來花弄影浮萍破處見山影隔牆

送過歙輓影等句時號張三影年八十九卒有文集十
百卷

徐教授無黨

徐無黨永康人從歐陽脩學古文辭脩嘗稱其文日進
如水涌而山出又云馳騁之際非常人筆力可到膏肓
五代史妙得良史筆意皇祐中以南省第一人登進士
第仕止郡教授而卒惜勿究厥施云

知南雍周蕙彥鐔

周鐔字蕙彥鄞人師厚之長子也生而秀穎十歲如拔

人十四人太學力學勤苦登元豐二年進士第。元祐六年
籍諸子百氏之說悉論著其本旨爲文踔厲爽超古
作者不以絺章繪句爲工言必期於有用旁至天文地
理罔不該博初調桐城尉辭不赴祭酒豐稷給事中范
祖禹力薦之起知南雄以言邊事忤時相入黨籍退休
西湖作四休堂日吟哦山水間所著有文集二十卷承
宣集一卷明天集一卷六甲奇書一卷

晉陵令陸元光蒙老

陸蒙老字元光歸安人博學喜吟咏嘗爲晉陵宰時州

幕官有好譏同列者一日同會聞蟬幕謂陸曰君可詠
此陸卽席詠曰綠陰深處汝行藏風露從來是稻粱莫
倚高枝縱繁響也宜回首顧螳螂其人聞之自是少戢
吳縣令沈膺達遼

沈遼字膺達錢塘人遼弟也少好學傲睨一世讀左氏
班固書少摹倣之輒近似乃鋤植縱舍自成一家長於
詩歌尤工翰墨王安石曾布皆學其筆法安石得其清
勁布得其真楷超轡高爽飄飄然有物外意絕不喜進
取登第後游京師偶爲人書裙帶內侍買入禁中神宗

初嗣位，勵精求治，見之不悅，會遣使察訪兩浙，就以論之時，遽爲吳縣令，遂遭劾。王安石救之，不能釋，乃坐削籍。後卜居池陽，築室曰雲巢。好事者多往遊焉。遼追悔平生不自貴重，悉謝棄，少習杜門，隱几作爲文章，雄偉綺鍊，魯羣、燕軾、黃庭堅皆與唱酬，然竟不復起。元豐末卒，所著有雲巢編。

毛筠州維瞻

毛維瞻，西安人，以詩名。與趙清獻、杜同里相得，爲山林之樂。元豐中，出知筠州，政平訟理，民惟樂之，如親父母。

時菴子由謫筠州監酒相與唱和有鳳山八詠山房卽事十絕傳誦藝林

劉燾

劉燾長興人生而警敏讀書目數行下終身不忘工文辭提筆立就無淹思弱冠游太學與陳亨伯等以八俊稱元祐三年蘇軾知貢舉賞其文章與雅置之高第尤工書法筆勢遒勁黃庭堅嘗曰江左又生羊欣矣有見南山集

安撫使陳思子汝錫

陳汝錫字思子，青田人。幼穎悟，博學善屬文。咸以其詩示黃庭堅，堅有聞，悉莫浪遺，留爲痛飲，資黃擊節歎賞曰：「我輩人也。」登紹聖四年進士。邑之登第者，自汝錫始。提舉福建學事，官至浙東安撫使，卒。贈中大夫，有宦溪集十二卷。

秘書正字周汝成邦彥

周邦彥字汝成，錢塘人。疎曠少檢，不爲州里推重。而博涉百家之書。元豐初游京師，獻汴都賦萬餘言，神宗是之。命侍臣讀於通英閣，召赴政事堂，自太學諸生一

爲正字。五歲不遷。益肆力於文章。出教廬州。知潯水縣。
遷爲國子主簿。哲宗召對使館。前賦除秘書正字。歷校
書郎。累官至殿中丞。出知順昌府。自號清真居士。
有清真集二十四卷。

司勳郎鮑欽止慎由

鮑慎由字欽止。龍泉人。少侍父克祿官湖外。時同色何
琬在長沙。大熱。文士慎由以少年坐末。坐卽席命賦。而
妨詩。慎由立就。意新詞警。文不加點。張舞民輩皆驚曰。
此郎他日必以文章顯。後登元祐進士。召對。上曰。見卿。

何曉邪除工部員外郎、歷胡勲考功、內外所至有聲生
黨禁流落、註杜詩、又註夷白堂集、神宗嘗御札、乘白書
夷白堂三大字賜之、

毛秀州澤民滂

毛滂字澤民、江山人、元祐中、秘載守錢塘、滂爲法曹、秩
滿時去、是夕燕客、有籍妓歌贈別小詞、落句云、今夜山
深處、斷魂分付潮回去、載以爲佳、因問妓誰作、以毛法
曹對、載語客曰、郡寮有此詞人、不及知載之罪也、翌日
折簡追還、留連數月、滂因此得名、官至祠部副郎、知秀

州所著有東堂集

魯虔州伯能

魯伯能。安吉人。博學強記。九歲通五經。日讀萬言。家貧。無油。夜乘月光誦讀。達旦。歷官虔州太守。生平無他嗜好。唯以文翰自娛。有文集三百餘卷。

林國材幹

林幹。字國材。樂清人。崇寧初。士皆以舍法論秀登名。幹獨不事舉業。屏跡田里。閉門著書。居木榴山。因號木榴子。著淵通四十八篇。以儆老子道德經著畢思十三篇。

以倣楊子法言。邑令鮑輝得其書而讀之。歎曰。理義精微。非後學所能測。其涯涘程守道。慨撰時政以進。幹爲進策五十篇。業成而卒。所著書多散逸。不傳。學者惜之。洪州錄參萬先之庚。

萬庚字先之。樂清人。善詞賦。太學典首中優選。紹聖甲戌。上舍釋褐。授緡雲尉。調全州教授。清湘士子簞火初至郡。丐增廩給以養士。郡將異其才。俾兼攝幕職爲文。雄深雅健。追步韓柳。湖南諸郡碑碣。不得庚文。不以登石。秩滿改洪州錄參。庚允文人相玉。十朋自泉南貽書。

薦之謂庚爲上舍第一。今太學上游多在館閣而獨庚
泯沒乞加識擢以獎恬退。虞得書議除學官未上卒。

新喻尉喻季直良弼

喻良能何恪陳炳附

喻良弼字季直義烏人。與兄良能叔奇俱以古文辭有
聲太學。良能咸建士而良弼僅以特科尉新喻。有杉堂
集十卷。樂府五卷。龍州陳亮曰。烏傷四君子。叔奇與人
煦煦有恩。能使人別。法三日念之不釋。其爲文精深簡
雅。讀之愈久而意若新。季直遇人無親疎貴賤皆與之
盡其文。蔚茂馳騁。蓋將包羅衆體而一字不苟。讀之。

臺而無厭也。四君子尤宜於詩興。則何恪茂恭陳炯
德先也。四人之中良能最知名。一時鉅公若洪內翰道
陸待制萬里諸名公皆與爲文字交。

何恪字茂恭博雅好古工文辭藏書至萬餘卷以進士
主承新簿再調徽州錄事參軍未赴諸闕上萬言書進
恢復二十策與朝論不合歸所著有南湖集二十卷
陳炯字德先才氣卓犖面目嚴冷與人寡合好古文務
爲青語登進士第爲太平縣主簿陳龍川曰德先舉二
世不足以當其意而人亦不願從之遊然其文清新勁

慶要不可少所著有易解五卷、巖堂雜稿二十卷、

潘雄飛翼

潘翼字雄飛、青田人、建炎末徙居樂清、貫穿諸子百家之書、凡禮樂制度、與夫傳註箋疏、雜說靡不淹通、明天文、作星圖、證驗休祥畢應、又著九域賦、凡山川州里遠近、與嘗親歷者言無少異、枯隱僻字、補註韻篇、遺漏辨爾雅本草名物、訓釋舛誤尤工、古文記問、橫臆動輒數千言、邑之聞人登科者、多出其門、詹事王十朋少從之游、每歎不能竟其學、後二十年、將編次其文、刊諸泉南、

會召不果。今多散逸。不傳。爲可惜焉。

中書舍人范元卿端臣

范端臣字元卿。蘭谿人。賢良浚之從子也。受學於浚。以宏博稱。紹興中登進士。累官至中書舍人。右史。雖入官。未嘗廢學。文詞典雅。尤工於詩。有集三卷。出入風騷。卓然名世。學者稱爲蒙齋先生。

集英殿修撰何德輔

何輔字德輔。龍泉人。博學工文。以進士教授紹興時。方與金和妖。輔哀少康。周宣王。漢光武。晉元帝。事可施行。

者爲中典。龜鑑上之。乾道間。以集英殿修撰出知廬州。
上賜詩祖餞。有奏議內外制。西漢補遺。大學講義若干。
卷藏於家。

樞密院編修官姚令威寬

姚寬字令威。涪人。舜明之次子也。由江東安撫累遷樞
密院編修官。博學強記。尤精天文。完顏亮入寇。虜衆百萬
人爲震慄。寬抗論歲星入翼。虜亡之兆。未幾。亮果斃。後
入兵疾作。仆榻前卒。上爲官其一子。所著有西溪集十
卷。註司馬遷史記一百三十卷。補註戰國策三十一卷。

五行秘記一卷及玉璽等書又擬樂府數篇俱超超漢魏云

滕元秀岑

滕岑字元秀桐廬人紹興名士平生苦吟與陳埴相倡和其佳處自謂高視大曆十才子所作詩凡三千首趙汝愚知郡日借其稿竟掩不還故傳者絕少

林進士伯仁越

林越字伯仁父通自龍泉徙家青田之沙阜而生越登紹興二十一年進士監行在諸司審計平生學力深於

漢史撮其文附以訓詁凡五十篇名曰漢雋一夕感夢上帝召署仙官無疾而逝

南陵尉蔣朝式則

蔣則字朝式縉雲人舉進士第調尉南陵適歲大侵則諭巨室出米數十萬石減直賑糴惠及當塗池陽之境修復廢陂溉田數萬頃則詩體平淡深得盛唐人志趣佳句多落人口嘗試百雁圖美特立指爲雞群野雀

進士王子問壁

王壁字子潤鄞人生而穎異七歲日誦千言一過輒不

忘弱冠登進士第。年少氣銳，以遠大自期。悉焚前所爲。舉子文披閱羣書，蘊畜日富。舉筆爲文，波瀾洶湧。朝廷方復博學宏辭科，首冠其選。未及授官而卒。士論痛惜之。

江東提刑王順伯厚之

王厚之字順伯，諸暨人。乾道二年進士，歷淮西運判。每言事忠懇，溢出。改江東提刑。進寶謨閣，致仕。平生好古博物，尤注意金石刻文。所著有金石錄三十卷，考異四卷，考古印章四卷，題跋周宣王石鼓文後考訂秦惠王

祖楚文精鑒絕識刻畫深淺賡辨無遺識者賞其博雅
太府卿王清叔卿月

王卿月字清叔臨海人博學工古文辭不隨時好力還
古雅登乾道五年鄭僑榜進士第歷官太府寺丞假吏
部尚書克金國生辰使未行進太府卿卒終朝散大夫
卿月嘗惟中書舍人直學士院掌制誥所草詞百餘篇
不避嫌不修怨不飾美以市恩不畏勢以屈筆深得代
言之體嘗草胡銓制云吾寧身蹈東海獨仲連不肯帝
秦至今名重泰山微相如何以彊趙時論重之自稱醒

庵居士所著有醒庵集

衡陽簿薛持志寘

薛寘字持志昌國人少有文名及長以聖人執權賦領
鄉薦調衡陽簿時史彌堅帥湖南一日寇起黑風洞檄
寘往無論將至有道其姓名者其首曰非四明作聖人
執權賦之薛寘邪遂投戈而退

朝奉大夫華安仁鎮

子初平附

華鎮字安仁會稽人登進士官至朝奉大夫鎮博古工
詩文名冠一時嘗輯會稽覽古詩幾百餘篇最稱精嚴

子初平亦登進士爲太常博士討論典故據經攷索初
無阿附靖康初爭金人尊號貽怒當塗及二聖北狩竟
憂憤卒

知臨安鞏仲至豐

鞏豐字仲至武義人學敏而蚤成自童丱時前輩源緒
古今音節事之因革總統固已多所該習宿艾駭服以
爲積數十年燈火勤力聚數十家師友講明猶不能到
淳熙中以太學上舍擢進士第累官知臨安縣改提轄
左庫藏卒所著有東平集二十七卷文無險怪華巧而

以理屈人。片詞半簡。皆清朗得言外趣。尤工爲詩。多至三千餘首。

隆興教授陳彥羣季雅

陳季雅字彥羣。永嘉人。質靈氣邁。隨聞而思。遇見能述。自高其才。不樂師授。與人論無所降人。亦未之然也。異日州將薦季雅。高等讀其書。道熟如素持。往往加以新意。出人上。始大歎駭。中淳熙進士第。授隆興府教授。改漳州。未上。益閉門。盡抽古今文字。且誦且索。務爲周覽。編索鈎得其要。年四十五卒。所著有兩漢博議等書。

守興化軍樓叔暘昉

弟明用

樓昉字叔暘鄞人登紹熙進士與弟明俱以文名少從呂成公游其文汪洋浩博凡所論議援引敘說小能使之大而統宗據要風止水靜泊然不能窺其深從學者常數十百人最顯者鄭清之應繇鄭次申趙與權尤善章表李壁黃裳爲侍從所爲文俱出昉手守興化軍以疾卒清之旣相追贈直龍圖閣率其弟子祭於墓

閤門舍人潘德久

父文虎附

潘檉字德久永嘉人父文虎右科第一檉以父任補右

職繼舉戎幕召試爲閤門舍人久之授福建兵馬鈐轄
卒平生喜爲詩下筆立成聲名籍甚人莫能儔永嘉言
唐詩自櫟始有轉庵集若干卷

趙紫芝師秀

翁卷徐璣附

趙師秀字紫芝永嘉人登紹熙第浮沉州縣改秩而卒
自乾淳以來漁洛之學方行諸老類以窮經相尚時或
言志取足而止固不暇如昔人體驗聲病俾律呂相宣
也至潘耒出始倡爲唐詩而師秀與徐照翁卷徐璣繹
尋遺緒日鍛月鍊一字不苟下由是唐體盛行其詩清

新園美若野水多於地春山半是雲濕近春風濕松多
曉日青等句人傳誦之一

徐道輝照

徐照字道輝永嘉人工詩水心葉適銘其墓云有詩數
百斷思尤奇皆橫出敘起水懸雪跨使讀者變踣慘慄
首肯不自己又云發令人未悟之機回百年已廢之學
使後復言唐詩自君始不亦詞人墨客之一快也其許
之如此

著作郎劉安道澹然

劉澹然字安道松陽人博極羣書舉嘉泰壬戌進士歷
官秘書省著作郎初安道之爲舉子也遊三衢試士以
風雲龍虎之賦魁於衆作郡守史相奇其才而館穀之
邑人項安世徙江陵其子容孫以浙東憲使行縣展墓
安道以啓致之曰立春繡於霄漢之上孰不慕公子之
威名耀晝錦於井落之間我但羨長卿之丰度又曰千
萬世之人物山川盡收入吏部精神之表八十歲之鄉
隣父老尚能誦平翁鼎角之詩其俊逸之才如此著直
午溪集

周會卿學古

子宗夷孫如堅附

周學古字會卿行已孫也兩薦漕闈卒不第遂息意場
屋以風雅自娛水心葉適序之云周會卿與潘德久齊
名德久漫浪江湖吟不擇地故所至有聲會卿常閉戶
讀書盤措生語有若天設德久甚畏之居謝池坊宿山
宅水自成深致其子宗夷遺予家集零落十數紙感失
怙早收次不多然一幹之蘭芳香出林豈紛然桃李能
限斷哉宗夷名景略爲鄉善士孫如堅登丙辰右科終
合浦令

國子助教陳繹魯

陳繹魯，括蒼之龍丘人。生而口吃，喜讀書，精敏異常。諸經註疏多能成誦，文辭汪洋浩博，其氣燁如論者。謂與莆田陳旅相伯仲。官至國子助教。

秘書少監俞蕪善亨宗

俞亨宗，字蕪善，山陰人。隆興二年進士。洪迥帥越，開亨宗行義，延至郡齋。又偕至番陽，與迥弟樞密達內翰邁游，日以文章爲事。後知漳州，以勤幹稱。嘉定初，入爲秘書少監，以老求奉祠。章六上，除直顯謨閣，主管成都府。

王局觀卒年八十九所著有文豪二十卷宏詞習業五卷山林思古錄十卷羣經感發十卷

北門學士盧申之祖臯

盧祖臯字申之永嘉人登慶元第歷館閣嘉定中以軍器少監與建人徐鳳並直北門屆時慶澤孔殷綸言沓布祖臯抒思泉涌號爲稱職當事方將處以不次俄卒於官工樂府意度清遠江浙間多歌之有蒲江集

翰林學士應之道猷

應猷字之道昌國人第嘉定十六年進士未第時袁越

公韶爲京尹錄掌牋記留門下。一夕坐有美堂欣然若有得。同門客有最善樂府者暮從外歸問曰何欣然也以擬明堂詔書屬對甚善答之客哂曰一第脫飢寒猶未能明堂詔何施焉。錄後直內制卒用所擬詔而客以樂府游公卿間困躓以死。教授臨安鄭丞相清之見其文奇之。清之將拜相俾草相麻後卒用焉。錄以著作郎義學上院權直端平開邊兵敗洛陽錄與邊議坐斥而清之亦罷相居東湖益與錄收拾文史號建章集皆制誥所需清之再相錄復用以禮部掌內制遂力薦爲內

相理宗疑焉。一夕召歸入院降詔草五制。夜四鼓進人上始信之。翌日卽除翰林學士。後拜叅知政事。以疾告歸卒。

國子司業陳壽老耆卿

陳耆卿字壽老。臨海人。嘉定七年進士官至國子司業。博學能文。遠參洙泗。近探伊洛。周旋乎賈馬韓柳歐蘇魯之間。疆場甚寬而步武甚的。葉水心見之驚詫起立爲序其所作以爲學游揚而文張晁也。至其獨得於古聖賢者中夜授之垂死囑焉而曰吾向語呂伯恭今以

語壽老四十年矣。水心既歿，壽老之文歸然爲一時所宗。所著有論孟紀蒙、貧窵集、赤城志行於世。

萬竹先生高端叔元之

高元之字端叔，鄞人家。貧，無書，得易編口誦不輟數月。其豈櫛隣士憐之，稍借之書，後受易春秋學於沙隨程迥。時傅伯成爲郡教授，少許可，折節與之。元之是鄉學者，數百人師事之。元之作變離騷九篇，曰：「悲嬋娟曰臣，薄才曰惜來，日日感迴波曰力，勵曰危表曰悲，嬋娟曰古。」誦曰：「釋思傳於人口，宋儒擬騷弗能及也。」集春秋說。

三百餘家號義宗悉本經旨凡百五十卷易詩論語後漢曆志解各一卷詩三千雜著五百號茶甘甲乙藟五上禮部卒不第將死手屬書樓鏤以歐陽公南省白欄求志文貧不能葬門人會葬於桃源鄉立祠祀之號萬竹先生

趙叔午汝迂

趙汝迂字叔午樂清人族貴且蕃兄弟羣從多掇高科登顯仕汝迂尤以能詩名登嘉定第駸駸進用矣因夜雨梧桐王子府春風楊柳相公橋之句觸時相怒謫官

淪落不得志而卒

神童柴蒙亨

柴蒙亨長臺人母徐娠夢神人遺大珠乃生蒙亨甫能
言卽口授書日萬餘言過耳輒不忘六歲暗誦九經通
春秋大旨郡將面試童科作文者三以神童聞得免解
加賜帛益勵志力學端平二年初赴省嘗從幸六和寺
上指示塔云一塔七層八面萬佛千燈蒙亨卽應聲曰
孤舟雙槩片帆五湖四海上大嘉之卒於杭華而不實
惜夫有詩集若干卷

趙幾道汝回

趙汝回字幾道永嘉人登嘉定第終主管進奏院名重一時苦吟興致高邁自成一家詠橘花云春風過後雪初白夜雨晴時水亦香詠水僊云屈原一點沉湘恨李白三生捉月身皆爲詩人所珍從其學者多知名

時天彝少章

時少章字天彝金華人天才絕出博極羣書談經多出新意而於史學尤精詩出入諸家由盛唐而上追漢魏文溯宋東都以前而逮古作者初由鄉貢入太學年六

十始登寶祐癸丑進士調麗水簿改教授婺州用薦者
擢史館檢閱或忌其才高遂以凌躡劾之未上而罷改
授實寧軍節度掌書記奉祠卒所著有易詩書論孟大
義六十卷論孟詩贊說易卦贊雜文古歌詩數千篇總
之爲所性集

嚴州司戶趙澤民崇滋

趙崇滋字澤民永嘉人少穎悟博學負志卓犖早視一
世登嘉定第調嚴州司戶尚氣不屈每與守諍守降意
下之趙與憲長版曹檄和羅浙右辭不行人贊其清同

年生多居要津不肯附麗以求速化工詩優入騷人域過荆沅哭崔悼步月諸篇膾炙江左善筆札得義獻遺意每興到拂紙援毫頃刻成數千言曳金玉而走龍蛇觀者神駭以是名重一時

閻風先生舒舜侯嶽祥

舒嶽祥字舜侯寧海人寶祐進士官終承直郎年二十六時以文見吳荆溪荆溪稱其異稟靈識如漢賈誼終軍唐李觀李賀本朝王令邢居實輩後果以文學名奉化戴表元在元大德間稱東南大家其得於嶽祥者後

多所著有史述漢祔補史家錄蘇野稿避地稿篆畦稿
蝶軒稿梧竹里稿三史纂言談藜藜續藜殘藜傳藜肆
昔遊錄深衣圖說凡二百二十卷學者稱爲閬風先生
忠州判官趙季清善得

趙善得字季清永嘉人少以恩入仕繼登紹定進士第
歷僊居丞忠州判官考舉及格未引見卒性穎悟文思
泉湧下筆輒千言嘗云今人不解道古以胸次不如古
豈惟不能道古亦未能鋪今蓋有四難意難濶聞難廣
情難寫心難公又云作文如下黑白子有眼者勝又云

閱文如閱好山起伏多也子汝棗孫崇栗俱登科

解元姚正子夢午

姚夢午字正子慈谿人生有異質七歲學小戴禮輒能言其領要邑大夫葉汝明面試中庸首章義及牧愛堂詩秋水出笑容賦皆援筆立就葉大驚異乃大書神童家三字以旌之九歲欲應鄉書一時豪雋以買太傅期之不卽偶場之中都徧交當世知名士讀所未見書筆力益肆年三十六始發解未五十遽卒黃東發誄之曰正子起自童卯而長老先生折節相下起一介布衣而

當世知名士聞風願交不獲少聚見於世惜哉

戴復古式之

父東臯子附

戴式之字復古黃岩人其父東臯子以詩名式之承家學又嘗登陸放翁之門故翁與真西山稱其詩不下孟浩然所著有石屏集行於世

黃彥實叔英

黃叔英字彥實鄞人先大父文潔先生舉寶祐丙辰進士負材能尚氣節而尤邃於經術叔英能世其家而於經史百氏過目輒成誦爲文俊拔偉麗意氣奔放若不

所禦而要其歸能弗畔於道有顛菴下筆三卷詩文雜著總二十卷藏於家

處州教授邵德芳桂子

邵桂子字德芳淳安人安仁簿吳攀龍子也鞠於所養因從其姓以博學宏詞登進士第教授處州弃官而歸鑿池構屋扁曰雪舟晚年慕天隨子之風家於松江之修竹鄉歿乃遷葬平生喜爲詩而意象冲融足淹高聽裁謝風塵之表脫超凡徑之外所謂卧游巖壑思遠滄洲瀟洒風流固宜爾也所著有雪舟腔談腔稿等書

編修林能一千之

林千之字能一平陽人由右岸賜第再換文科歷官樞密院編修官知信州千之性穎異博洽今古工文辭深爲江萬里諸人所知迨元初徜徉里居以翰墨自娛家藏圖書法帖甚富鑒裁精審士林以好古博雅推之所著有雲根癡菴集

尹耕道起莘

尹起莘字耕道柘溪人隱居不仕學問該洽有感於古今治亂興亡之變因朱子資治通鑑綱目爲著發明五

十卷、大行於世、魏了翁稱其深得文公之意云

薛叔容據

薛據字叔容、平陽人、性明敏、有志於學、弱冠、文譽已彰、諸老爭相延致、嘗採諸子百家、裨官緯紀之書、輯孔子集語二十卷、又撫古今輔相經略開濟之業、粹爲宅揆、成鑑一篇、二書既成、中書舍人劉克莊、秘書監謝子強、見而愛之、率同列進之、朝略云、藩垣置筆、華漆不衰、上可備乙夜之覽、觀次可入崇文之藏、貯其爲時賢賞激如此

翰林承旨趙子固孟堅

趙孟堅字子固，海鹽人。系出安定郡王。初以父蔭入官。後登進士第，歷官集英殿修撰，知嚴州，遷翰林學士承旨。孟堅修雅博識，善筆札，工詩文，酷嗜書法，多藏三代以來金石名跡，入善作梅花水僊、蘭竹、於山水尤奇。世皆珍之。襟度瀟灑，有六朝諸賢風致。時比之米南宮。晚徙居崇德，年九十七卒。謚文簡。

孫因晉

孫因，晉餘姚令。統之後也。隱居四明山，逍遙鹿亭樊榭。

間博綜今古工文筆嘗採會稽遺事作越間以補王十朋風俗賦之缺騷林多傳之

知江寧莫光朝

莫光朝崇德人博學強記下筆數千言縱橫曲折無不盡文之致尤好爲詩力洗宋末庸劣之陋識者謂其得意處不在唐人下舉進士知江寧以撫字稱

元 共四十三人

學錄鄭德仲芳叔

子覺民附

鄭芳叔字德仲鄭人宋亡徧遊遺老之門博學廣記家

貧無書嘗假與篇秘秩射自繕錄積數十百卷爲文一
根理要不事浮靡而縱橫曲折筆與心應從游常數十
人兩司郡訓敦厚嚴重以道自尊而尤篤於人倫晚暑
學錄未上卒子覺民字以道積學累行不墮父名母嘗
患日日以舌舐之卽愈後病癘衣不弛帶父當葬適病
痞甚劇人止其臨壙泣曰幸從先人訖大事卽道死無
憾返而差薦授龍游教諭三月卽弃去以疾卒有文集
三十三卷

于介翁石

于石字介翁蘭溪人貌古氣剛喜談諧以風流自命少從王宗庵業辭賦接聞諸老緒論其學多所通解自負甚高宋改物後隱居不仕一意於詩出入諸家豪宕激發氣骨蒼勁望而知其爲山林曠士也一時言詩者多引以爲不及有集若干卷金履祥嘗序之

淵穎先生吳立夫萊

吳萊字立夫浦江人生而慧解四歲口授孝經論語及穀梁傳應聲成誦七歲能賦詩族父幼敏家素多書萊每私取讀之幼敏從旁竊窺乃班固漢書也指谷永杜

鄒傳謂曰汝竊窺吾書能誦此當貸汝爵米琅然誦之
至終篇不遺一字幼敏三易他篇皆如初因盡出所有
書使讀之方鳳時寓幼敏家歎曰明敏如此兒雖汝南
應世叔不是過也悉以其學授焉自是該貫古今無所
不考年未冠撰論倭千七百言論議俊爽識者謂有秦
漢風延祐七年以春秋舉上禮部尋以所言不合於有
司退居深巖山中益窮諸書與古著尚書標說六卷春
秋世變圖二卷春秋傳投圖一卷古職方錄八卷孟子
弟子列傳二卷楚漢正聲二卷樂府類編一百卷唐集

刪要三十卷、文集六十卷、萊尤喜論文、嘗云、作文如用
兵、兵法有正有奇、正是法度、要部位分明、奇是不爲法
度所縛、舉眼之頃、千變萬化、坐作進退、擊刺一時俱起
及其欲止、什伍各還其隊、元不曾亂、聞者服之、柳貫平
生極慎許與、每稱萊爲絕世之才、黃潛晚年謂人曰、萊
之文、蘄絕雄深、類秦漢間人所作、實非今世之士也、吾
縱操觚一世、又安敢及之哉、其爲前輩所推許如此、以
御史薦、調長蘅書院山長、未上、卒、年四十四、君子惜之、
私謚曰淵穎先生、

教授戴帥初表元 任士林附

戴表元字帥初奉化人七歲學古詩文多奇語積長從里師習詞賦輒弃不肯爲咸淳中第進士調臨安教授行戶部掌故不就大德八年執政薦起家拜信州教授以疾辭初表元閩宋季文章氣萎薈而辭體酸腐陋已甚慨然以振起斯文爲已任時四明王應麟天台舒嶽所並以文學師表元皆從受業焉故其學博而肆其文清深雅潔化陳腐爲神奇蓄而始發聞事舉意而隅角不露施於人者多尤自秘重不妄許與至元大

德間東南以文章大家名者唯表元而已有剡源集行於世當表元時四明有任士林者亦以文章知名云

黃宏

黃宏黃岩人博覽羣經尤長於辭賦宋亡寄意於酒醉卽長吟不輟人有慕其名而造之者相對兀坐終日不得一語或以酒飲之不醉不已醉復長吟亦終不得其一語人皆以爲不可測至正初有以史才薦者宏笑而不就自是不復家居落魄江湖者幾三十年遂以客死文章流播四方有穀城集若干卷

侍講學士袁伯長楠

袁楠字伯長慶元人。宋同知樞密詔之曾孫。幼穎悟絕。棄戲弄。始從戴表元學。績文脫去凡近。長師王應麟。授以文獻淵懿。深有悟造。尤長於論史。悉究前朝典故。叩之。登亮不倦。嘗謂宋末文燁濫。益自奮厲。希古作者。大德間。用薦爲翰林檢閱。擢應奉。尋除待制。詞義冠絕。職內外制。纂修累朝實錄。多裨國論。累遷至侍講學士。恬退。歸里。自稱清客。居士卒。贈江浙行中書參知政事。諡軍陳郡公。謚文清。有文集五十卷。刊於家。

翰林待制柳道傳貫

柳貫字道傳，浦江人。幼有異質，穎悟過人。受經於金履祥，學文於方鳳、吳思齊、謝翱。自經史百氏、兵刑律曆術、數方技、異教外書，靡所不通。作爲文章，涵肆演迤，春容舒徐。人多傳誦之。年三十一，始用察舉，爲江山縣學教諭，改國子助教，擢太常博士。時方承平，稽古禮文之事，次第並舉，遇有所規畫設施，必俟貫論定。泰定三年，出提舉江西等處儒學，多延名儒爲學者師。士風大振，已而召爲翰林待制，兼國史院編修官。到官僅七閱月，以

疾卒年七十三。館閣之士多至灑泣者。貫局度凝定。燕
居默然端坐。嚴重若神。卽之如入春風。中人與之處未
嘗見疾言遽色。雖有桀驁者。瞻其德容。莫不氣奪而意
消。生平以獎進人材爲已任。人有一善。諄諄稱舉。唯恐
不聞。天曆以來。與崇仁虞集。豐城揭傒斯。義烏黃潛。齊
名天下。高之號曰四先生。善楷法。工篆籀。兼能鑒定古
彝器書畫。而別其真贋。所著有文集二十卷。別集二十
卷。字系二卷。近思錄廣輯二卷。金石竹帛遺文若干卷。
翰林承旨趙子昂孟頫

大人管氏子雅附

趙孟頫字子昂吳興人宋之宗室也登進士第爲潤州錄事參軍國亡家居絕意仕進時時以文翰自娛至元間以薦入朝世祖見其神采煥發軒軒霞舉心甚異之卽拜兵部侍郎日被寵眷累官翰林學士承旨卒謚文敏追封魏國公孟頫博學多才風流蘊藉六經諸史百家之書無不該洽搦筆爲詩文千百言立就不務雕幾組織而以春容平澹爲工文追東都詩在元和長慶間畫師顧陸人物飛走花草竹木無不點染絕神而尤精於山水其高處不減王右丞書摹漢魏得力乃在大令

學窠飛白種種皆妙。至於蠅頭細楷大無半菽而結構有經丈之勢。此其獨詣。至今片楮隻字傳在人間者。價重於珠玉。真一代之才人。秋林之傑士也。夫人管氏亦善書。画尤工於寫竹。風枝雨幹烟稍露葉無不逼真。然能取態勢於筆墨之外。所以爲妙。子雍字仲穆。詩文書画俱不逮父。而以文雅繼其前修。亦可謂能子。官至海州知州。

翰林學士陳子經經 祖著父泌附

陳經字子經。奉化人。官至翰林學士。祖著。宋秘書監。知

江州曾本綱自著書以紀歷代之統。又泌元饒州教授表章家學訓釋唯謹。經自東髮受書。卽思弘前人之業。乃敷筆紀二百卷。又上論盤古逮於高辛。會於有宋。比事較義。尊正統以定大分。其紀年師司馬公補遺。其書法師朱文公綱目名曰通鑑續編。行於世。

儒學提舉白廷玉珽

白珽字廷玉。錢塘人。博綜經史詩文。一主於理。紫陽方回劉辰翁稱其詩謝陶韋書逼顏柳。仕至江浙儒學副提舉。所著有湛困集。

金叔肖似孫

金似孫字叔肖金華人少雋敏強記工舉子業文科既廢遂一意於詩清新警拔有思致善諷切人然性傲俗寡交好便酒多與人忤既憊無所施益縱於酒家遂旁落感激悲憤一發於詩歌與師道稱其負才不屑於俗殆古之所謂狷者其詩觸事感時亦足以附於風人之列云

陳景傳堯道

父希聲弟舜道附

陳堯道字景傳義烏人父希聲以文學爲後進師堯道

好學不羈。浮游物表。以能詩聲。黃潛稱其詩涵肆彬蔚。如奇葩珍木。洪纖高下。雜植於名園。終日玩之。而不厭。弟舜道朝出耕。夜歸讀古人書。薄已而厚物。縉紳稱之。

吳見心復

吳復字見心。富春人。少落拓不羈。中歲折節讀書。晚好游聞。有名士不憚千里求見。見聞益博。善樂府歌詩。高處逼盛唐。與會稽張憲齊名。所著有雲槎集十卷。

徐秉國鈞

徐鈞字秉國。蘭谿人。宋汀州使君時升之子也。以父任。

爲濠州定遠尉。宋亡不仕。家故多書。發其篋。盡讀之。至古今興亡之變。治亂之故。有槩於中。則發爲詩。歌。通計一千五百三十首。名曰史詠。許白雲黃晉卿爲之序。

寧國司理楊仲弘載

楊載字仲弘。其先自浦城徙家錢塘。載少孤。事母孝。博涉羣書。年四十。以布衣召爲國史院編修官。延祐二年。舉進士。爲浮梁別駕。改寧國府推官。載爲詩文。以氣爲主。黃文獻公許其文博而敏。直而不肆。尤以詩名。家人問作詩法。答曰。詩當取才於漢魏。取音節於唐人。多宗

之與虞集揭傒斯范梈並駕齊名世稱虞楊范揭云

傅景文野

傅野字景文義烏人博學工文辭與劉應龜相繼以詩鳴於時黃潛嘗評其所作精切整暇如清江漫流一碧千里而魚龍百怪隱見不常

仇仁近遠

仇遠字仁近錢塘人元初爲溧陽州儒學教授工詩文一時遊其門者若張雨張翥莫維賢皆有名當時所著有山村集批註唐百家詩選

應彥文文虎

應文虎字彥文黃岩人家貧好學通易詩書三經尤長於詩虞伯生楊仲弘見其梅魂詩極加歎賞稱爲應梅魂黃潛卿陳衆仲嘗薦之不起

翰林學士承旨張仲舉翥

張翥字仲舉其先晉寧人父爲吏官杭州鈔庫副使遂卜居錢塘翥遂爲錢塘人翥少負才雋豪放不羈好蹴踘喜音樂不以家業屑其意其父以爲憂翥一旦翻然改曰大人勿憂今請易業矣乃謝客閉門讀書晝夜不

暫假受經學於李存得道德性命之說多所研究復從仇仁近學詩畫得其聲律之奧於是翦遂以詩文鳴於一時學者及門甚衆至元末以薦起家爲國子助教會修遼金宋三史授翰林國史院編修官歷遷侍讀兼祭酒翦勤於誘掖後進絕去崖岸不徒以師道自尊用是學者樂親炙之有質經義者必歷舉衆說爲之折衷論辯之際雜以談笑無不厭其所得而後已以翰林學士承旨致仕卒年八十二翦長於詩其近體長短句尤工文不如詩而每以文自負常語人曰吾於文已化矣蓋

吾未嘗構思特任意屬筆而已。它日翰林學士沙刺班示以所爲文，請易置數字，苦思者移時，終不就。沙刺班曰：「先生於文豈猶未化耶？何思之苦也？」翥因相視大笑。蓋翥平日善諧謔，出談吐語，輒令人失笑。一座盡傾入其室，諸然春風中也。所爲詩文甚多，無子多散佚者。僅有樂府律詩各三卷。翥嘗集兵興以來死節死事之人爲書，曰：「忠義錄，識者建之。」

甌寧縣丞盛明叟

盛明叟，昌化人，以文學名。築蒙齋讀書，因以自號。工文。

辭所著有凍蠅說雪賦蕨薇子傳爲士大夫所稱仕終
麗寧縣丞

秘書監丞李季和孝光

李孝光字季和樂清人少博學篤志好古文辭隱居雁
蕩五峯之下四方從遊者甚衆聲譽日聞泰不華以師
事之至正七年詔徵隱士以秘書監著作郎召見於宣
文閣進孝經圖說順帝大悅賜上尊明年陞文林郎秘
書監丞卒於官孝光以文章負名當世其文一取法於
古人而不趨世尚非先秦兩漢語不道有文集二十卷

歷山十記一卷行於世

葉景修森

葉森字景修錢塘人早從貞白先生吾子行遊古文歌
詩咸有法則一時所與交者如王直人眉叟薛真人玄
瞻張外史伯雨張承旨仲舉唱酬極富所著有瓦缶鳴
集膾炙人口

姚時和應鳳

姚應鳳字時和慈谿人自幼習家學卽以文字爲業頗
自雄其才爲文喜馳騁每屬筆於廣衆中詞鋒橫逸一

庶皆驚。後持以謁同郡袁桷。桷告之曰：子文不受束縛。然法度自不可廢也。應鳳領之。自是務爲莊重簡嚴。日益深邃。至元間。嘗就試省部。時以龍虎臺命題。有司得應鳳賦。歎曰：此楚漢故物也。遂擢置高第。今其詞猶爲世所傳誦。有納軒稿若干卷藏於家。

奎章閣博士柯敬仲九思

柯九思字敬仲。僊居人。官至奎章閣博士。號丹丘生。與虞伯生趙子昂爲友。工於詩。尤善画竹木。以書法作之。筆勢生動。論者以爲文與可之後一人。每得意輒題詩。

其上一時珍貴稱爲三絕

馮士願

馮士願富春人贈集賢修撰驥之子也少侗儻有大志稍長折節讀書博雅能文章作詩風格清俊與吳見心黃子久並負才名

高明

高明字則誠瑞安人性聰明自少以博學稱嘗自言曰人不明一經取第雖博奚爲乃自奮讀春秋識聖人筆削大義屬文操筆立就一時名公卿皆慕與文登至正

乙酉第授處州錄事。歷轉江南行臺掾。所至政績赫然。稱神明。數忤當路。謝病去。除福建行省都事。道經慶元。方氏強留置幕下。力辭不從。又以禮延教子弟。亦不就。卧病而卒。有詩文行於世。

桐廬李文

李文桐廬人。博學以能詩鳴。與楊鐵崖宋潛溪相往還。嘖嘖子山深器之。元季多故。江浙行省。以便宜行事。檄爲桐廬主簿。辭不就。遂與許立夫等游金華山中。飄然有物外之想。竟以詩文終所著有近山集。

莫景行雜賢

莫維賢字景行錢塘人好學能詩雅尚標致築別業於
雪隱天竺間遠屋栽杏號曰杏園日與騷人墨客游咏
其中列二十一題時人比之朝川所著有廣莫子稿

赤城令楊庶夫維楨

楊維楨字庶夫諸暨人太定丁卯進士授天台尹罷去
家居幾十年會修宋遼金三史維楨著正統辨千餘言
歐陽玄讀之歎曰百年公論定於此矣將薦之爲忌者
所阻尋用常格歷江西儒學提舉道梗不行張士誠據

浙西累使求致不能屈而撰五論及後書告以逆順成敗之說。太祖在軍中時聞其聲張士誠聘甚高其義。及登位召諸儒考集禮書。迫於敦遣。乃至京師。時年八十餘矣。作老客歸謚以見意。上笑而遣之。還松江卒。維楨在娠。母夢月中金錢墮懷而生。稍長。父器之。躬旣焉爲資俾遊甬東。得黃氏日抄歸。學業日進。平生性度夷曠。喜戴華陽巾披羽衣。與賓客周遊山水間。以聲樂自隨。有晉人風。居鐵崖山下。自號鐵崖先生。好吹鐵笛。亦號鐵笛子。與人交無疑貳。尤喜接引後生。識不識。

爲長者而惜不得大用。然亦以是得大肆其力於文辭。非先秦兩漢弗之學。又與俱化。縉紳先生與岩穴之士。投贄求文者。日無虛席。以致崖鑄野刻。布列東南。宋太史瀛嘗有言曰。元之中世。有文章鉅公。起於浙河之間。曰鐵崖先生。聲光殷殷。摩挲霄漢。吳越諸生。多宗之。殆猶山之宗岱。河之走海。然也。撫其論撰。如覩商敦。周彝。雲雷成文。而寒芒橫逸。奪人目睛。其於詩尤號名家。震蕩凌厲。如神施鬼設。不可察其端倪。其文中之雄乎。所著有四書一貫錄。五經鑰鍵。春秋透天關。禮經約。君子

議歷代史鉞補正三史綱目富春人物志廉則遺音
樂府上皇帝勅忠舜及平鳴瓊臺洞庭雲間祈主諸
通數育卷

附鐵笛道人自傳

鐵笛道人者會稽人祖關西出也初號梅花道人會
稽有鐵崖山其高百丈上有萼綠梅花數百植層樓
出梅花稽書數萬卷是道人所居也秦定國以春
經學擢進士第仕赤城令轉錢清海鹽皆不信其素
志輒棄官將妻子遊天目山放於宛陵毘陵聞雪竇

雲間山水最清遠。又自九龍山涉太湖西。沂大小
之澤。訪縹緲七十二峯。東抵海。登小金山。脫烏巾冠。
鐵葉冠。服褐毛寬博。手持笛一枝。自稱鐵笛道人。鐵
笛得洞庭湖中。冶人獮氏子。嘗掘地得古。其耶無所
用。銘爲鐵葉筒之。長二尺有九寸。竅其九。進於道人。
道人吹之。竅皆應律。音聲絕。人。世江上老漁。狎道人。
時時唱清款。乃道人爲作迴波引和之。仍自歌曰。小
江秋。大江秋。美人不來生遠愁。吹笛海西流。又歌曰。
東飛烏西飛烏。美人手弄雙明珠。九見烏生。離城東。

貴富人聞道人名多載酒道人所幸聞笛道人爲一
弄畢便卧遣客卽客不去卧吹笛自如也嘗對客云
笛有君山古弄海可養蛟龍可呼非釣天大人不發
也晚年同年夫有以遺逸白于上用玄纁物色道人
于五湖之間道人終不一起道人性疎豁與人交無
疑二雖病凶危坐不拔丈則弄札翰或理音樂素不
善奕画謂奕損開心圖爲人役見卽屏去至名山川
必登高遐眺想見古人風節曠邁非常人所能測也
與永嘉李孝光茅山張伯雨錫山倪鎮昆陽顧瑛爲

詩文友碧桃。叟釋臻知歸。叟釋現清容。叟釋信爲方。
外友其文有驚世者。有三史統論五千言。太平綱目
二十策。歷代史鉞二百卷。詩有瓊臺曲。洞庭雜吟五
十卷。藏於鐵崖山。云。贊曰。有美人兮。號鐵冠。冠鐵
葉之拳。拳兮。服兔褐之蹢躅。雷浦之濱兮。鐵崖之巔。
陰呼陽兮。履坤戴乾。萬竅不作兮。全領于天。其漆
園之傲吏兮。緱山之遊仙也耶。

戴叔能良

戴良字叔能。浦江人。性警敏。嗜讀書。雖祁寒暑雨。恒至

夜分乃寐。自經史以及天文地理、醫卜佛老之書靡不
詳究。初業舉于，尋弃去，專爲古學。時柳貫、黃潛、吳萊皆
以文章鳴於浙水東。良往來諸公門下，盡得其間。奧貫
卒，良爲經紀其家，持心喪三年。然後歸。余闕持節過婺，
聞良善詩歌，與論古今作者，詞旨優劣，闕欣然曰：「士不
知詩久矣。微子吾不敢相語，乃盡授以平生所得於師
友者。」於是良之詩名遂雄視東南。結屋縣西，日與同志
討論聖賢微旨，或與鄉之名賢寓公羽流釋子相與燕
集，爲樂酒酣賦詩擊節歌詠，蕭然有塵外之趣。至正丁

丑以薦擢江北等處儒學提舉時事不靖度無可行其志乃弃去逖跡四明山中益肆其力於詩文瑰奇磊落清新雅潔往往無媿於古作者洪武壬戌以禮幣徵至京召見試文稱旨欲官之以老病辭歸卒於家

孫以貞固

孫固字以貞嘉興人雅致恬澹讀書談道辟署華亭縣學事與楊鐵崖陶南村詩筒往來唱酬成帙固嘗自題其齋曰聽雪著有聽雪齋稿孫植官尚書自有傳

諮議參軍王元章冕

王冕字元章，诸暨人。年八歲時，父命牧牛隴上，竊入學舍聽諸生誦書，聽已，輒默記。暮歸，忘其牛，父怒撻之。已而復如初。母曰：「兒癡如此，曷不聽其所爲？」是因去，依僧寺以居。夜潛出，坐佛膝上，執策映長明燈讀之。琅琅達旦，佛像多惺惺，可怖。冕小兒，恬若不見。安陽韓性聞而異之，錄爲弟子。學遂爲通儒。性卒，門人思冕如事性時。冕父已歿，卽迎母入越城就養。久之，母思還故里，冕買白牛駕母車，自被古冠服，隨車後。鄉里小兒競遮道訕笑，冕亦笑，著作郎李孝光數薦之。當路欲署爲吏，冕罵。

曰吾有田可畊有書可讀肯朝夕抱案庭下備奴使哉
每居小樓客至僅入報命之登乃登部使者行郡坐馬
上求見拒之去去不百武冕倚樓長嘯使者聞之慚冕
屢應進士舉不中歎曰此童子羞爲者吾可溺是哉竟
舟去買舟下東吳渡大江入淮楚歷覽名山川或遇奇
才俠客談古豪傑事卽呼酒共飲慷慨悲吟人斥爲狂
北游大都館秘書秦不花家秦不花薦以館職冕曰公
誠愚人哉不十年此中狐兔遊矣尚可言仕卽日將南
轅會其友武林盧生死溧陽唯兩幼女一童留燕俛無

所依。冕知之。不遠千里。走濠陽。取生遺骨。挈二女還生家。冕旣歸。越復大言。天下將亂。時海內無事。或斥冕爲妄。冕曰。妄人非我。誰當爲妄哉。乃携妻孥。隱於九里山。種豆三畝。粟倍之。植梅千樹。桃李居其半。芋一區。薤韭各百本。引水爲池。種魚千餘頭。結茅廬三間。自題爲梅花屋。嘗傲周禮著書一卷。坐卧自隨。秘不令人見。更深人寂。輒挑燈朗誦。旣而撫卷曰。吾未卽死。持此以遇明主。伊呂事業。豈難致哉。當風日佳時。操觚賦詩。千百言不休。皆鵬騫海怒。讀者毛髮爲聳。人至不爲賓主禮。清

言竟日不倦。食至輒食。亦不煩辭。謝善。画梅不減楊補之。求者肩背相望。以繒幅短長爲得米之。差人譏之。冕曰。吾藉之以養口體。豈好爲人作画師耶。未幾。汝穎兵起。一如冕言。高皇帝旣取婺州。遣胡大海攻紹興。屯兵九里。居人徬徨奔避。冕獨不動。兵執之。則曰。我能爲若帥出奇計。乃與俱見大海。告以攻城之策。高皇帝聞其人。召與語。頗合。置幕府。授咨議參軍。一夕病卒。冕狀貌魁偉。美鬚髯。磊落有大志。不得少試。以死。宋太史濂曰。予受學城南時。見孟宋言。越有狂生。當天大雪。赤

脚上踏嶽峯四顧大呼曰遍天地間皆白玉合成使人
心膽澄澈便欲僊去及入城戴大帽如篋穿曳地袍翻
翻行兩袂軒翥譁笑溢市中予甚疑其人訪識者問之
卽見也見真恠民哉馬不惡駕不足以見其奇才見亦
類是矣

梁建中

梁建中錢塘人早嗜伊洛之學復有志於文辭下筆涓
涓數百言皆典雅溫厚得聖賢修辭垂訓之義絕不以
聲牙佞仙爲奇一時士大夫皆稱譽之金華宋濂序其

文集。澳門人稱建中。刻苦好學。老而不倦。以比漢之袁公業云。

林愚齋靜

林靜號愚齋。德清人。紹興時。卽解綴篇什。研窮經史。百氏旁及。玄銓釋典。無不掇其芳潤。郡邑累辟不就。以詩文自娛。著有愚齋集。宋濂爲之序。

沈元吉貞

沈貞字元吉。長興人。甘貧力學。雖在試。手不釋卷。宅傍有一井。冬夏源泉涌流。溉田數百畝。貞日往來吟咏。

其上絕無仕進意著茶山稿十二卷

兩浙名賢錄卷之四十六終